



Broj: 01/1-02-2596/18
Breza, 31.10.2018. godine

Z A P I S N I K

Sa DVADESETDRUGE REDOVNE SJEDNICE Općinskog vijeća održane dana 10.10.2018. godine sa početkom u 16,30 sati u prostorijama Općine Breza-Sala Općinskog vijeća.

Sjednicom je predsjedavao predsjedavajući Općinskog vijeća Jusić Vedad.

Po izvršenoj prozivci konstatovano je da sjednici Općinskog vijeća prisustvuje 20 vijećnika.

Opravdano odsutan vijećnik Bajrić Fetah.

Osim vijećnika sjednici Općinskog vijeća su prisustvovali: Općinski načelnik Munib Zaimović, pomoćnici općinskog načelnika: Smajila Omerhodžić, Meliha Beširević, Salih Hasanspahić, Herco Huso, predstavnik OSCE-a misije Daut Bajramović, šef Biroa za zapošljavanje Breza, te predstavnici medija.

Na početku sjednice se prešlo na razmatranje Zapisnika sa 21. redovne sjednice Općinskog vijeća Breza.

Primjedbi na Zapisnik nije bilo, te je nakon glasanja konstatovano da je isti usvojen jednoglasno sa 20 glasova ZA.

Zatim se prešlo na odgovore na vijećnička pitanja.

Vijećnica Nejira Bulbulušić-Muratović zatražila je dopunu vijećničkog pitanja koje se odnosi na držanje pasa u dvorištu porodične kuće od strane Kozlić Eldara u smislu da se pristupi prinudnom izvršenju donesenog rješenja te da se donese zaključak o dozvoli izvršenja te da nadležni inspektor Općine Breza pristupi izvršenju rješenja na način da se psi u dvorištu Kozlić Eldara zbrinu na zakonit način uz prethodno razmatranje svih zakonom propisanih uslova i budžetskih uslova odnosno da se razmotri mogućnost finansiranja prinudnog izvršenja na zakonit način te da se od izvršenika naplate troškovi izvršenja.

Zatim se prešlo na postavljanje novih vijećničkih pitanja.

Vijećnik Jekalović Amina postavila je pitanje i pokrenula inicijativu.

Da li se planira sanacija i asfaltiranje puta od novoizgrađenog mosta u ulici 6. april do pružnog prijelaza odnosno proširenje i sanacija puta od pružnog prijelaza do džamije u naselju Bulbulušići, što pitaju stanovnici koji koriste ovaj put.

Pokrenula je i inicijativu u ime stanovnika ulice Džemala Bijedića i molbe kućnog savjeta zgrade o mogućnosti da se na neki način pronađu sredstva za obnovu fasade i stubišta u zgradi koja je nedavno pretrpjela veću materijalnu štetu u požaru.

Vijećnik Bašić Mirnes u ime građana naseljenog mjesta G. Breza postavio je pitanje „Ko je odgovorna osoba koja je dala saglasnost da se na površinu površinskog kopa G. Breza 15.09.2018. godine kamionima firme iz Vogošće cijeli dan vršili dovoz komunalnog otpada oko 40 kamiona. Uz komunalni otpad dovezena su i dva manja kamiona životinjskog otpada iz pravca Visokog za što postoji i fotodokumentacija., o čemu je obavještena i PS Breza koja je napravila službenu zabilješku.

Vijećnik Sirotanović Arif postavio je dva vijećnička pitanja koja se odnose na proceduru i postupak imenovanja biračkih odbora, te postupak zastupljenosti političkih partija odnosno da

li lica koja su zastupala političke stranke u biračkim odborima imaju punomoć te stranke koja ne djeluje na području Općine Breza.

Drugo vijećničko pitanje odnosi se na ažuriranje biračkih spiskova kao i tačnost broja birača koji imaju pravo glasa na području Općine Breza, brisanje umrlih lica te provjeru lica koja stanuju na drugim Općinama.

Vijećnik Kadrić Memsud postavio je pitanje da li su planirana budžetska sredstva za asfaltiranje drugog sloja na lokaciji Ljiješće-Mahala i kad je planiran završetak istog.

Vijećnik Jusić Vedad pokrenuo je inicijativu da se kroz izmjene i dopune budžeta Općine Breza za 2019. godinu obezbijede i planiraju sredstva za sufinansiranje autobuskih karata, odnosno putnih troškova za srednjoškolce sa udaljenih područja naše općine.

Vijećnik Muratović Asim pokrenuo je inicijativu da se izvidi mogućnost postavljanja ležećih policajaca na raskrsnici puteva ulica Džemaludina Čauševića i ulice Sarajevski put. zbog vozača koji se kreću neprilagođenom brzinom.

Postavio je i pitanje „Zbog čega nije izvršena sanacija makadamskog puta u ulici „Pločnik“ podružnica Podgora.

Vijećnik Mirza Ahmedspahić pokrenuo je dvije inicijative da se izvrši sanacija udarnih rupa na lokalnom putu Bulbulušići-Kamenice kao i da se saniraju dvije krivine (crne tačke) kod džamije do igrališta Prikodolica obzirom na frekventnost puta.

Nakon postavljanja vijećničkih pitanja prešlo se na utvrđivanje dnevnog reda.

Predsjedavajući Općinskog vijeća predložio je dnevni red kao u sazivu.

Primjedbi na predloženi dnevni red nije bilo te je nakog glasanja sa 20 glasova ZA usvojen sljedeći:

D N E V N I R E D

- 1) Usmena informacija Općinskog načelnika između dvije sjednice
- 2) Razmatranje i usvajanje prijedloga Odluke o javnom redu i miru
- 3) Razmatranje i usvajanje prijedloga Odluke o utvrđivanju visina naknade predsjednicima savjeta mjesnih zajednica na području Općine Breza za 2018. godinu
- 4) Razmatranje i usvajanje prijedloga Odluke o usvajanju izmjena i dopuna regulacionog plana „Potkraj“
- 5) Razmatranje i usvajanje prijedloga Odluke o provođenju izmjena i dopuna regulacionog plana „Potkraj“
- 6) Razmatranje Nacrta Odluke o davanju naziva mostu na rijeci Stavnji u ulici 6.april, te donošenje Zaključka po istoj
- 7) Razmatranje i usvajanje Izvještaja o izvršenju Budžeta Općine Breza za prvih 6 mjeseci 2018. godine
- 8) Razmatranje i usvajanje Zaključka o davanju saglasnosti za obezbjeđivanje sredstava sa konta „Grantovi neprofitnim organizacijama“ u cilju deboklade računa FK „Rudar“ iz Breze
- 9) Razmatranje i usvajanje Izvještaja o održanoj kulturnoj i sportskoj manifestaciji „Bazenijada 2018“
- 10) Razmatranje i usvajanje prijedloga Rješenja o konačnom imenovanju člana Upravnog odbora JU „Centar za socijalni rad Breza“
- 11) Razmatranje Informacije o aktivnostima po Zaključku Općinskog vijeća broj: 01/1-02-1470/18 od 30.05.2018.
- 12) Razmatranje Izvještaja o stanju zapošljavanja na području Općine Breza i broj nezaposlenih po kvalifikacionoj strukturi za 2017.godinu

Ad.1

Informacija o aktivnostima Općinskog načelnika između dvije sjednice

Općinski načelnik upoznao je vijećnike da su u periodu između dvije sjednice vođene sljedeće aktivnosti:

- Završetak radova na realizaciji ugovora „Sanacija dijela lokalne ceste Breza-Mahmutović Rijeka, lokalitet Bulbulišići (most na Stavnji-prijelaz na pruzi)“
- Aktivnosti na izvedbi primarne nedostajuće staze na „Šehitluku II“
- Aktivnosti na realizaciji Ugovora o izvedbi radova na izgradnji dječijeg igrališta u centru grada
- Završne aktivnosti na realizaciji projekta sanacija klizišta u naselju Opreč, faza I
- Aktivnosti na uvođenju izvođača radova u realizaciju ugovora na izvedbi pješačke staze u naselju Mahala-dionica od škole „Safvet beg Bašagić“ do benzinske pumpe „Nahonal-gas“
- Završen postupak nabavke za sanaciju lokalnih saobraćajnica u naselju Vardište, očekuje se uvođenje izvođača u posao
- Aktivnosti na provođenju postupaka nabavke: izvedba završnog sloja asfalta AB 11 na lokalnoj cesti Mahala-Liješće; Sanacija krova DTV „Partizan“,
- Aktivnosti na realizaciji projekata izvedbe toplotne fasade i fasadne stolarije na objektu O.Š. „Safvet beg Bašagić“, područna škola u naselju Župča
- Aktivnosti na realizaciji projekata izvedbe toplotne fasade i fasadne stolarije na objektu obdaništa „Ulmihana Čuvidina“ u Brezi
- Aktivnosti na provođenju postupka nabavke, preko nadležnog ministarstva, na realizaciji projekata. Ucjeljenje potoka Jasike u centru grada, faza II, dionica II i projekta vodosnabdijevanja naselja Slivno- faza III – izgradnja rezervoara Slivno
- Aktivnosti na provođenju Programa redovnog održavanja javnih cesta na području općine Breza u ljetnom periodu

U daljnim aktivnostima radilo se na pripremi izrade budžeta za 2019. godinu, te su na adresu budžetskih korisnika upućeni pozivi da dostavu prijedloga za kreiranje budžeta za 2019. godinu.

Ad 2.

Razmatranje i usvajanje prijedloga Odluke o javnom redu i miru

Vijećnik Avdić Edin istakao je da je najvažnije da ova odluka bude u skladu sa zakonom i pozitivnim zakonskim propisima, da policijska stanica po istom i postupa, odnosno „Zakon za sve niko iznad zakona“.

Vijećnik Sokić Dževahid u svojoj diskusiji je istakao da se član 18. i 32. poklapaju i ponavljaju te da za istim nema potrebe i da se jedan od članova izbriše. Zadužuje se stručna služba Općinskog vijeća da ispravi ovu tehničku grešku.

Učesnika u raspravi više nije bilo te je Odluka o javnom redu i miru uz datu primjedbu i usvojena jednoglasno sa 20 glasova ZA.

Ad.3

Razmatranje i usvajanje prijedloga Odluke o utvrđivanju visina naknade predsjednicima savjeta mjesnih zajednica na području Općine Breza za 2018. godinu

Pomoćnik Općinskog načelnika za finansije, opću upravu i inspeksijske poslove pojasnila je da se radi o neto iznosu a ne o brutu kako je navedeno u prijedlogu.

Nakon datog pojašnjenja, prijedlog Odluke je usvojen jednoglasno sa 20 glasova ZA.

Ad.4

Razmatranje i usvajanje prijedloga Odluke o usvajanju, izmjena i dopuna regulacionog plana „Potkraj“

Pomoćnik Općinskog načelnika Smajila Omerhodžić upoznala je vijećnike da je u skladu sa Odlukom Općinskog vijeća izrađena dokumentacija izmjena i dopuna Regulacionog plana industrijske zone „Potkraj“, te u formi Nacrta usvojena na Općinskom vijeću i stavljena na javni uvid i javnu raspravu.

Nakon javne rasprave razmotreni su svi prikupljeni prijedlozi i primjedbe, neke prihvaćene djelimično, neke u cjelosti, a neke i odbačene.

Na Nacrt izmjena i dopuna Regulacionog plana, a u skladu sa Zakonom o prostornom uređenju i građenju („Službene novine ZE–DO kantona“, broj:1/14) je pribavljena saglasnost kantonalnog Ministarstva za prostorno uređenje, promet i komunikacije i zaštitu okoline, izdata pod brojem: 12/09-11254-6/18 od 05.07.2018. godine, čime je dokumentacija kompletirana, te se prijedlog plana predlaže Općinskom vijeću na usvajanje.

Nakon datog pojašnjenja predstavnik IPS-a instituta Harić Mijkić detaljno je izvršio prezentaciju izmjena i dopuna regulacionog plana „Potkraj“.

Vijećnik Buljetović Ćamil postavio je pitanje šta je ovim planom predviđeno na lokalitetu bivše firme „Bretex“ čiji radnici već godinama pokušavaju riješiti svoj radno pravni status.

Od strane pomoćnika Općinskog načelnika i pravobranioca Općine Breza pojašnjeno je da se ovim regulacionim planom ne rješava pitanje vlasništva navedenog zemljišta, te da je nakon sudskog postupka vlasništvo dodjeljeno ZDK.

Vijećnik Avdić Edin prokomentarisao je da su regulacioni planovi ustvari korupcioni planovi. Stručne službe bi trebale imati podatke šta se to ulaže i koja je vrijednost ulaganja, te šta se planira graditi te koji su efekti po građane, kako korist od istog ne bi pripala pojedinim moćnicima te pribaviti studiju isplativosti i fizibilitu studiju kako bi vijeće moglo donijeti ispravnu odluku.

Učesnika u raspravi više nije bilo te je nakon provedenog postupka glasanja konstatovano da je Odluka o usvajanju izmjena i dopuna regulacionog plana „Potkraj“ usvojena jednoglasno sa 20 glasova ZA.

Ad.5

Razmatranje i usvajanje prijedloga Odluke o provođenju izmjena i dopuna regulacionog plana „Potkraj“

Bez učesnika u raspravi jednoglasno sa 20 glasova ZA, usvojen je Odluke o provođenju izmjena i dopuna regulacionog plana „Potkraj“

Ad.6

Razmatranje Nacrta Odluke o davanju naziva mostu na rijeci Stavnji u ulici 6.april, te donošenje Zaključka po istoj.

Vijećnik Buljetović Ćamil postavio je pitanje da li je prethodno obavljen razgovor sa investitorom o mogućem nazivu mosta.

Predloženo je da se provede javna rasprava u roku od 30 dana u okviru vijećnika Općinskog vijeća, savjeta mjesnih zajednica i ostalih zainteresovanih subjekata na području Općine Breza, te putem službene Web stranice Općine Breza sprovesti anketu sa građanima o nazivu mosta na rijeci Stavnji u ulici 6.april.

Nakon toga jednoglasno sa 20 glasova ZA usvojen je sljedeći:

Z A K L J U Č A K

I

UTVRĐUJE SE Nacrta Odluke o davanju naziva mosta na rijeci Stavnji u ulici 6.april

II

Po utvrđenom Nacrta Odluke o davanju naziva mosta na rijeci Stavnji u ulici 6.april sprovesti javnu raspravu u periodu od 30 dana od dana objavljivanja zaključka u Sl. glasniku Općine Breza.

III

Javnu raspravu sprovesti u okviru vijećnika Općinskog vijeća, savjeta mjesnih zajednica i ostalih zainteresovanih subjekata na području Općine Breza, te putem službene Web stranice Općine Breza sprovesti anketu sa građanima o nazivu mosta na rijeci Stavnji u ulici 6.april.

IV

Za realizaciju zaključka zadužuje se Služba za privredu.

Ad.7

Razmatranje i usvajanje Izvještaja o izvršenju Budžeta Općine Breza za prvih 6 mjeseci 2018. godine

Pomoćnik Općinskog načelnika Meliha Beširević pojasnila je da je Izvršenje budžeta zasnovano na pravnom okviru čiji su detalji dati u Zakonu o budžetima - proračunima FBiH i Odluci o izvršavanju Budžeta Općine Breza za 2018.godinu. Izvršenje budžeta je provođenje plana budžeta.

Budžet Općine Breza za 2018. godinu usvojen je na sjednici Općinskog vijeća držanoj 29.12.2017.godine u iznosu od 5.460.000 KM.

Ukupan prihod Budžeta Općine Breza u periodu od 01.01.2018. godine do 30.06.2018. godine, ostvaren je u iznosu od 2.359.788,56 KM, što je 43,22 % planiranih prihoda za 2018. godinu.

Rashodi Budžeta za isti period iznose 2.126.880,98 KM, što je 38,95 % plana za 2018. godinu.

Procent izvršenja Budžeta Općine Breza za 6 mjeseci 2018. godinu je 110,95 %, što znači da je ostvaren budžetski suficit od 10,95 % ili 232.907,58 KM.

Do ostvarenja suficita došlo je usljed različitosti nastanka troškova po pojedinim stavkama rashoda tokom prvih šest mjeseci, jer određeni rashodi zahtjevaju sprovođenje određenih zakonskih procedura npr. postupak provođenja javnih nabavki za kapitalne i infrastrukturne projekte, nastanak pojedinih troškova u trećem i četvrtom kvartalu godine, dok u drugom i prvom dijelu godine uopšte ne nastaju...

Realnija slika ostvarenja prihoda i rashoda nastaje tek u drugom polugodištu tekuće godine, tako da je omjer prihoda rashodi najobjektivniji za analizu nakon trećeg kvartala nastanka kako prihoda tako i rashoda.

Ostvareni suficit je korišten za izmirenje prenesenih obaveza iz ranijeg perioda.

Neizmirene obaveze na dan 30.06.2018. godine iznose 1.506.504,00 KM.

Program pokriva ukupnog deficita Općine Breza će biti prezentiran Općinskom Vijeću u mjesecu novembru 2018. godine.

Vijećnik Avdić Edin istakao je da procenat izvršenja treba da je 50% od planiranog. Ukupan prihod budžeta iznosi 2.359.788.56 KM što je 43,22% od plana za 6 mjesec. 2018. godinu i trebao bi da iznosi oko 2.730.000.000 KM.

Rashodi budžeta su za isti period su 2.126.880,98 KM, što je 38,95% plana za 2018. i trebalo je da se utroši 2.730.000.000 KM.

Ostvareni suficit je korišten za izmirenje prenesenih obaveza iz ranijeg perioda

Neizmirene obaveze na dan 30.06.2018. godine iznose 1.506.504,00 KM.

Svima nam je poznato da su neizmirene obaveze na dan 31.12.2017. godine iznose 1.595.890.000 KM ovo izmirenje je negdje oko 90 hiljada, te se može zaključiti da ovdje nema ostvarenog suficita nego samo ne poštivanje odluka Općinskog vijeća kada je u pitanju Budžet i Izvršenje budžeta što se ogleda u sljedećim stavkama.

Konto za plate veći je za 17,18% više nego je planirano i veći je za oko 117 hiljada KM više nego je planirano odnosno oko 20 hiljada KM mjesečno, što Općinsko vijeće nije donijelo, što je ne poštivanje Općinskog vijeća, bez obzira što uvijek kada je na dnevnom radu Izvještaj o izvršenju Budžeta, ukazuje se na ove propuste i ništa se nije promijenilo.

Konto za racionalizaciju radnih mjesta planirano je oko 65 hiljada za otpremnine i samo je mrtvo slovo na papiru i izvršen je u malom procentu u iznosu od oko 4,56%, što je dovoljno za otpremninu za penzionisanje jednog radnika..

Kada bi se napravila tematska sjednica u kojoj bi se raspravljalo o budžet i Izvršenju budžeta za prethodnih 10 godina, i da se tačno prezentira koliko je planirano a koliko je utrošeno, odnosno koliko je izvršeno odnosno nije izvršeno iz budžeta, koliko je više dato za plate i materijalne izdatke a manje za razvoj i investicije, za grantove mjesnim zajednicama, vidjeli bi da se rade malverzacije sa ovim budžetom. Općinsko vijeće to nije donijelo svojom odlukom, što znači da se ne prate usvojene odluke Općinskog vijeća koje su donesene odnosno izvršna vlast ne prati usvojene Odluke Općinskog vijeća. Općinsko vijeće i pojedini članovi poniženi su i podcjenjeni pred nosiocima vlasti i to bezbroj puta. Konto za rad komisija povećano je za oko 130% više nego je planirano, što Općinsko vijeće takođe nije donijelo. I svakao je iritirajuće da se svaki put govori o stvorenom suficitu, što nam se tačno ne kaže šta je i šta se čeka. Daje se mogućnost da se iz određenih razloga uz obrazloženje glasa za budžet a može da se i ne glasa za izvršenje Budžeta .Općinsko vijeće nema nikakve ingerencije kada je u pitanju Budžet i Izvršenje budžeta i stvar je u rukama jednog ili dva čovjeka, a mi kao Općinsko vijeće smo napustili svoje ingerencije i ne pratimo Izvršenje Odluka koje smo donijeli. Potrebno je pristupiti određenim promjenama, ili raspustiti ovakva Općinska vijeća ili da načelnik i stručne službe i pomoćnici načelnika idu na reizbor svake godine i tek tada neće biti ovih problema koje sada imamo. Izdaci za mobitele takođe su povećani za veliki iznos.

Vijećnik Buljetović Ćamil istakao je da neće glasati za ovaj izvještaj obzirom da se na polju unapređenja finansiranja sporta ništa nije uradilo te da je za 6 mjeseci dato 35 hiljada što nije onoliko koliko je planirano. Rješavanje statusa FK Rudar također ništa nije urađeno. Slaže se da nije stvoren suficit i da nije izvršeno ono što je planirano budžetom za 2018. godinu.

Predsjedavajući Općinskog vijeća Jusić Vedad u ime kluba vijećnika SDA istako je da je su u proteklom periodu ukazivali na ovakvo stanje i nepoštivanje zaključaka Općinskog vijeća, te da nije bilo prijedloga i mjera za stabiliziranje budžeta.

Podržavaju prijedlog komisije za budžet i finansije i to:

a) Da se u najkraćem roku sačini plan mjera kojim bi se zadržali iznosi bruto plata u budžetskim okvirima, odnosno što prije provesti planirane mjere zbrinjavanja viška radnika, da ove stavke budžeta ne prouzrokuju neravnotežu u budžetu.

b) Da Služba za finansije, inspeksijske poslove i opću upravu uradi procjenu izvršenja budžeta zaključno sa septembrom 2018. godine, kako bi izvršenje budžeta bilo osnova za što je moguće realnije planiranje Budžeta Općine Breza za 2019. godinu, imajući u vidu činjenicu da se Izvještaj o izvršavanju Budžeta za period od 01.01.2018. godine do 30.06.2018. godine razmatra u oktobru mjesecu tekuće godine i da su podaci za III. kvartal već raspoloživi i da su osnova za izradu budžeta za narednu godinu.

Nakon rasprave predsjedavajući Općinskog vijeća predložio je sljedeći :

ZAKLJUČAK

DA SE sačini plan mjera kojim bi se zadržali iznosi bruto plata u budžetskim okvirima, odnosno što prije provesti planirane mjere zbrinjavanja viška radnika, da ove stavke budžeta ne prouzrokuju neravnotežu u budžetu.

II

Da Služba za finansije, inspeksijske poslove i opću upravu uradi procjenu izvršenja budžeta zaključno sa septembrom 2018. godine, kako bi izvršenje budžeta bilo osnova za što je moguće realnije planiranje Budžeta Općine Breza za 2019. godine, imajući u vidu činjenicu da se Izvještaj o izvršavanju Budžeta za period od 01.01.2018. godine do 30.06.2018. godine razmatra u oktobru mjesecu tekuće godine i da su podaci za III. kvartal već raspoloživi i da su osnova za izradu budžeta za narednu godinu.

II

Za realizaciju zaključka zadužuje se Služba Službe za finansije, inspeksijske poslove i opću upravu

Nako provedenog postupka glasanja konstatovano je da je predloženi zaključak usvojen sa 19 glasova ZA i 1 suzdržanim glasom.

Ad 8.

Razmatranje i usvajanje Zaključka o davanju saglasnosti za obezbjeđivanje sredstava sa konta „Grantovi neprofitnim organizacijama“ u cilju deboklade računa FK „Rudar“ iz Breze

Pomoćnik Općinskog načelnika Meliha Beširević pojasnila je da se zaključkom daje saglasnost za obezbjeđenje sredstava sa konta „Grantovi neprofitnim organizacijama“ odnosno iz konta sredstava planiranih za sport u cilju deblokade računa FK „Rudar“ iz Breze.

Predsjedavajući Općinskog vijeća Jusić Vedad slaže se da pomogne FK Rudar u prevazilaženju finansiske blokade računa ali je upitan način i procedura te predlaže se zaključak nađe na dnevnom redu Komisije za Statut i propise kao i komisije za Budžet i finansije kako vijeće ne bi donijelo nezakonitu odluku.

Općinski načelnik pojasnio je da se ovdje ne vrši preusmjeravanje novčanih sredstava sa jednog konta na drugi nego se radi o preraspodjeli novčanih sredstava unutar istog konta, te smatra da nema zakonskih smetnji.

Vijećnik Buljetović Čamil smatra da predloženi iznos sredstava u iznosu od oko 60 hiljada nije logičan prijedlog i da se ne radi o iznosu iz donesene presude te traži da se iznos smanji i ponovo izračuna.

Općinski načelnik iznio je hronologiju događanja oko deblokade računa te predlaže da se još jednom obave razgovori odgovornim licima kako bi se donijela zadovoljavajuća odluka.

Vijećnik Sirotanović Arif predlaže da se formira komisija u čijem sastavu će biti predstavnici sportskog kluba i vijećnika, te da se obavi razgovor sa „Eketom“.

Vijećnik Kadrić Memsud u kratkim crtama upoznaje vijećnike da FK Rudar okuplja omladinu raspoređenu u pet selekcija, koji marljivo treniraju, te zbog vršenja različitih finansijskih transakcija je potrebno što prije izvršiti deblokadu računa FK Rudar.

Predsjedavajući Općinskog vijeća istakao je da nema ništa protiv da se izvrši deblokada računa FK Rudar ali da bi bilo dobro da vijeće ne bi donijelo nezakonitu odluku da predloženi zaključak razmotri komisija za Statut i propise i komisija za Budžet i finansije.

Učesnika u raspravi je bilo te je predsjedavajući Općinskog vijeća predložio sljedeći:

ZAKLJUČAK

I

Da Komisija za Statut i propise Općine Breza i Komisija za Budžet i finansije daju svoje mišljenje na prijedlog Zaključka o davanju saglasnosti za obezbjeđenje sredstava sa konta „Grantovi neprofitnim organizacijama“ a u cilju deblokade računa FK „Rudar“ iz Breze,

II

Za realizaciju zaključka zadužuje se Komisije Općinskog vijeća, Komisija za Statut i propise i Komisija za Budžet i finansije.

Nakon provedenog postupka glasanja konstatovano je da je predloženi zaključak usvojen jednoglasno sa 20 glasova ZA.

Ad 9.

Razmatranje i usvajanje Izvještaja o održanoj kulturnoj i sportskoj manifestaciji „Bazenijada 2018“

Učesnika u raspravi nije bilo te je nakon glasanja konstatovano da je sa 18 glasova ZA i 2 suzdržana glasa usvojen Izvještaja o održanoj kulturnoj i sportskoj manifestaciji „Bazenijada 2018“.

Ad 10.

Razmatranje i usvajanje prijedloga Rješenja o konačnom imenovanju člana Upravnog odbora JU „Centar za socijalni rad Breza“

Vijećnik Buljetović Čamil istakao je da problem imenovanja člana Upravnog odbora traje dosta dugo. Zakon je jasno definisao pravila te da ispred uposlenih treba da bude jedan član Upravnog odbora. Predlaže se da se u Upravni odbor JU Centar za socijalni rad Breza imenuje: Kadrić Mirela, kao član.

Učesnika u raspravi više nije bilo te je nakon provedenog postupka glasanja konstatovano da je rješenje usvojeno sa 18 glasova ZA i 2 suzdržana glasa.

Ad 11.

Razmatranje Informacije o aktivnostima po Zaključku općinskog vijeća broj: 01/1-02-1470/18 od 30.05.2018.

U skladu sa članom I Zaključka broj: 01/1-02-1470/18 od 30.05.2018. godine, doneseno je Rješenje o imenovanju radne grupe koja će pripremiti prijedlog lokacije za izgradnju reciklažnog dvorišta. U radnu grupu su imenovani pomoćnici Općinskog načelnika i predstavnici mjesnih zajednica i naseljenih mjesta gdje su prostornim planom Općine Breza predviđene lokacije za izgradnju reciklažnih dvorišta.

Učesnika u raspravi po predloženoj tački dnevnog reda nije bilo.

Ad 12.

Razmatranje Izvještaja o stanju zapošljavanja na području Općine Breza i broj nezaposlenih po kvalifikacionoj strukturi za 2017. godinu.

Šef biroa za zapošljavanje Bašić Fikret vijećnike je detaljno upoznao sa radom Biroa za zapošljavanje Breza o stanju zapošljavanja na području Općine Breza i broj nezaposlenih po kvalifikacionoj strukturi za 2017. godinu.

Vijećnik Buljetović Čamil postavio je pitanje koja zanimanja su najtraženija te je odgovoreno da su to građevinski radnici, vozači, zidari, tesari itd.

Vijećnik Kadrić Memsud postavio je pitanje zašto je 3000-4000 hiljade više lica prijavljeno na birou. Može li se desiti da se lica prijave na biro pa onda idu u inostranstvo, šta se radi da se zaustavi odlazak radnika. Gospodin Bašić pojasnio je da su obavljani razgovori sa školama te se učenici upoznavaju sa deficitarnim zanimanjima te da će nakon završetka školovanja imati zaposlenje. Pored toga mali broj učenika opredjeljuje se za deficitarna zanimanja. Također je pojasnio da lica koja idu u inostranstvo također moraju na birou riješiti svoj status.

Vijećnik Avdić Edin osvrnuo se na činjenično stanje o broju lica koja su brisana sa evidencije biroa za zapošljavanje iz razloga preseljenja te je također istakao problem odlaska radno sposobnih građana sa područja Općine Breza u EU te kako Općinsko vijeće može spriječiti trend odlaska radne snage.

Ovim je iscrpljen dnevni red dvadesetdruge redovne sjednice Općinskog vijeća Breza, koja je sa radom završila u 19:40 sati.

Sastavni dio ovog zapisnika čini i tonski zapis sjednice.

ZAPISNIK SAČINILA
Zakira Smailbegović

PREDSJEDAVAJUĆI
Općinskog vijeća
Jusić Vedad